

ԱՐԾՐՈՒՆ ՀՈՎՀԱՆՆԻՍՅԱՆ, Տարածաշրջանի ռազմականացումը և հայոց բանակը, Ե., հեղինակային հրատ., 2013, 267 էջ:



Հարավկովկասյան տարածաշրջանի ռազմականացման ուսումնասիրությունը կարևոր է ոչ միայն տարածաշրջանի երկրների ռազմական հնարավորությունները և ներուժը հասկանալու, կանխատեսումների, այլև հայկական երկու հանրապետությունների ռազմաքաղաքական անելիքների ճշգրտման տեսանկյունից: Տարածաշրջանում առկա բարդ խնդիրների հանգույցը ժամանակակից միջազգային հարաբերությունների ամենաբարդ ոլորտներից է: Այս համատեքստում ռազմականացումն ու սպառազինությունների արդիականացումը շարունակում են կարևոր դեր ունենալ ընթացիկ տարածաշրջանային գործընթացներում: Չկարգավորված հակամարտությունները, Հարավային Կովկասում Ռուսաստանի, Թուրքիայի, Իրանի հեգեմոնիայի հաստատման հավակնություններից

բխող մրցակցությունը, ինչպես նաև Ադրբեջանի ռևանշիստական քաղաքականությունը ՀՀ և ԼՂՀ ռազմաքաղաքական անվտանգության դեմ ուղղված լուրջ մարտահրավերներ են, որոնց դիմակայելու համար որոշիչ նշանակություն ունեն հայոց բանակի հզորացումը, արդիականացումն ու սպառազինության արդյունավետ օգտագործումը: Ցավոք, ժամանակակից աշխարհակարգը դեռևս չի կարողանում ամբողջովին ապահովել ժողովուրդների և պետությունների խաղաղ համակեցությունը, իսկ միջազգային իրավունքի վրա խարսխված աշխարհակարգի ժամանակակից մոդելը շատ դեպքերում աչքի է ընկնում արդյունավետության պակասով՝ «ռազմական հավասարակշռություն» հասկացությունը պահպանելով որպես անվտանգության ապահովման գլխավոր բաղադրիչներից մեկը: Հարավկովկասյան տարածաշրջանի ռազմականացման գործընթացի ուսումնասիրությունը և դրան համահունչ հայոց բանակի հզորացումն ու արդիականացումը չափազանց կարևոր խնդիր է, քանզի 1994 թ. մայիսյան զինադադարի ժամանակներից ի վեր հարևան Ադրբեջանը շարունակում է ռազմականացման գործընթացը՝ թիկունքում ունենալով Հայաստանի մեկ այլ հարևանի՝ Թուրքիայի ռազմաքաղաքական աջակցությունը:

Ճիշտ է, աշխատության շրջանակում կատարված ուսումնասիրությունները հիմնականում կենտրոնացած են սպառազինման գործընթացի և ռազմական ներուժին առնչվող խնդիրների վրա, սակայն ամբողջական համալիրում հեղինակն ուշադրության կենտրոնում է պահել նաև տարածաշրջանային հարաբերությունների պատմագիտական, քաղաքագիտական և հոգեբանական հիմնահարցերը: Տարածաշրջանի ռազմականացման գործընթացի ուսումնասիրությունը և այս համատեքստում հայոց բանակի խնդիրները հայ ընթերցողի համար ունեն ճանաչողական լուրջ նշանա-

կություն: Հեղինակը շրջանառության մեջ է դնում իր տրամադրության տակ եղած ծավալուն նյութը՝ ի ցույց դնելով աշխարհաքաղաքական նշանակության այն կարևոր հանգամանքը, որ ռազմական առկա ներուժը և ռազմաքաղաքական իրավիճակը շատ դեպքերում կանխորոշում են ինչպես դաշնակիցների շրջանակը, այնպես էլ համագործակցության ծավալներն ու մակարդակը: Ուշագրավ է, որ Ա. Հովհաննիսյանը փորձում է պատմաբանների, քաղաքագետների և ռազմական փորձագետների լայն շրջանների ուշադրությունը հրավիրել այն հանգամանքի վրա, որ ժամանակակից աշխարհում ռազմական լարվածությունը չի նվազում, իսկ Հարավային Կովկասում աշխարհաքաղաքական մրցակցությունն ու տարածաշրջանում առկա չկարգավորված հակամարտությունները զարկ են տվել աննախադեպ ռազմականացման՝ ստեղծելով այնպիսի նոր տեսակի պատերազմների սպառնալիք, որտեղ քանակական գործոնները համադրվելու են նորարարական մոտեցումներին, չեն լինելու միայն գերճգրիտ հարվածային միջոցների կիրառությամբ՝ հանդիսանալով չորրորդ և հինգերորդ սերունդների պատերազմների յուրօրինակ միջինացված սինթեզ:

Թեև տարածաշրջանի երկրների վրա ուղիղ կամ միջնորդավորված ազդեցություն ունեն բոլոր գերտերությունները, սակայն այս աշխատության մեջ հեղինակը առավել հանգամանալիորեն անդրադարձել է Հայաստանի հարևան երկրներին՝ տարածաշրջանի ռազմականացումը դիտարկելով հայ ժողովրդի և հայոց պետականության ազգային անվտանգության համատեքստում: Իրանի միջազգային մեկուսացումը և սրան առնթեր ռազմականացումը, իրանական զինանոցում առկա սպառազինության ուսումնասիրությունը, վերլուծությունը և Իրանի ռազմաարդյունաբերական համալիրի ստեղծած զինատեսակների մասնագիտական քննարկումը մեծ արժեք են հաղորդում Ա. Հովհաննիսյանի աշխատությանը: ՆԱՏՕ-ի անդամ Թուրքիան և Հայաստանի հետ փաստացի պատերազմի մեջ գտնվող Ադրբեջանը Իրանը դիտարկում են որպես տարածաշրջանային լուրջ մրցակից, ինչը ՀԱՊԿ անդամներ Հայաստանին և Հարավային Կովկասում ծանրակշիռ ռազմական ներկայություն ունեցող Ռուսաստանը վերածում են Իրանի բնական դաշնակիցների:

Աշխատությունը շատ կարևոր լույս է սփռում նաև ժամանակակից Թուրքիայի ռազմական հնարավորությունների և ներուժի վրա: Հայոց ցեղասպանությունը ժխտող, Հայաստանի հետ դիվանագիտական հարաբերություններ չունեցող և ռազմատենչ Ադրբեջանին աջակցող Թուրքիան լրջագույն ռազմական սպառնալիք է: Այս առումով Ա. Հովհաննիսյանը բովանդակալից գնահատական է տալիս. «Թուրքական բանակը արագորեն կերպարանափոխվում է, ինչը պահանջում է ավելի մեծ ուշադրություն: Չնայած բազում թերություններին և բացթողումներին և ներկայումս բավականին միջականցված հզորությանը, թուրքական բանակն արագ առաջ է ընթանում: Թուրքական բանակի հզորացումը հատկապես առարկայական հետաքրքրություն է ներկայացնում տարածաշրջանային մրցավազքի և Ադրբեջանի հետ ունեցած հարաբերությունների համատեքստում: Գաղտնիք չէ, որ Թուրքիան Ադրբեջանի հիմնական հովանավորն ու ապավենն է» (էջ 40):

Հեղինակը հատուկ ուշադրության է արժանացրել տարածաշրջանային անվտանգությանը առավելագույնս սպառնացող Ադրբեջանին՝ մի քանի ենթազույգ նվիրելով ռևանշիստական տրամադրություններ ունեցող այս երկրի ռազմական փաստացի հնարավորություններին ու սպառազինությանը, ռազմական ներուժի դինամիկային, որոշակի հարվածային միջոցների տեխնիկական հնարավորությունների ուսումնասիրությանը, ինչպես նաև հայոց բանակի հետ համեմատականներին: Ըստ էության, Ա.

Հովհաննիսյանի աշխատությունը եզակի փորձերից է գիտական հիմքերի վրա հակազդել աղբբեջանական պետական քարոզչամեքենայի աշխատանքին: Համացանցը, արբանյակային հեռուստաթերթը օգտագործվում են աղբբեջանական բանակի ձեռք բերած հարվածային միջոցները գովազդելու, դրանց տեխնիկական ու մարտական հնարավորությունները չափազանցնելու գործում: Բաքվում ուժ ու եռանդ չեն խնայում ներքին և արտաքին լսարանի համար ստեղծել աղբբեջանական բանակի հզորության և հայոց բանակի հանդեպ ունեցած առավելության առասպելը, իսկ գիտական անաչառության վրա հիմնված սույն աշխատությունը ջրի երես է հանում աղբբեջանական քարոզչամեքենայի կեղծ տեղեկատվությունը՝ հայ ընթերցողին հնարավորություն ընձեռելով ծանոթանալու օբյեկտիվ իրականությանը:

Ուշագրավ է նաև աշխատության շրջանակում տեղ գտած տարբեր ռազմական միջոցների վերաբերյալ տեղեկատվությունը: Հեղինակը, օգտվելով օտարալեզու աղբբյուրներից, հեղինակավոր միջազգային կազմակերպությունների և գործակալությունների գեկույցներից, տարատեսակ սկզբնաղբբյուրներից, կարողացել է հանրության դատին ներկայացնել տարատեսակ ռազմական միավորների, ռազմական տեխնիկայի փաստաթղթային և իրական հնարավորությունների մասին արժեքավոր վերլուծություն: Իսկ աշխատության «Առաջարկություններ ՀՀ ՁՈՒ-ի բարեփոխումների շրջանակներում» ենթագլուխը արժեքավոր է բանակային համալիր ծրագրերն ուսումնասիրող մասնագիտական ոլորտների համար: Ժամանակակից աշխարհում իրադարձությունները շատ արագ են զարգանում, ուստի ՀՀ և ԼՂՀ քաղաքացիների անվտանգությունն ապահովող գլխավոր պետական ինստիտուտը՝ հայոց բանակը, պետք է ունակ լինի արագորեն հարմարվելու, անգամ առաջ ընկնելու ժամանակից և դիմագրավելու սպասվող ռազմական մարտահրավերներին: Մեր օրերում չափազանց կարևոր են նաև հեղինակի մոտեցումները արցախյան գոյամարտի 1993-1994 թվականների ռազմարվեստի փորձը ներկայացնելուն ուղղված քայլերը, ինչպես նաև աղբբեջանական բանակում առկա հոգեբանական խնդիրների վերլուծությունը, դրանց ճիշտ ընկալումն ու հնարավոր պատերազմի դեպքում նախորդի փորձի վրա հիմնված արդյունավետ հակաքայլերի մշակումը: Ինչպես աշխատության վերջաբանում շատ դիպուկ նկատում է հեղինակը՝ «Վերջին բնագծից չկա նահանջ, միայն առաջ: Հակառակորդին հարկավոր է վերջնական ծնկի բերել ու մասնատել» (էջ 209):

Աշխատության մեջ հանդիպում են որոշակի վրիպակներ. այն շարադրված է «տեխնիկական» հայերենով, գուցե ասվի՝ հենց գինվորական լեզվով, նյութերի տրամաբանական համակարգում որոշ խախտումներով: Սակայն դա բնավ չի ստվերում այն ծանրակշիռ ավանդը, որ մենագրությունն ունի տարածաշրջանի ռազմականացման և հայոց բանակի հիմնախնդիրների ուսումնասիրության գործում: Անտարակույս, Ա. Հովհաննիսյանի հեղինակած ուսումնասիրությունը կրավարարի մասնագետների և ընթերցողների լայն շրջանակի խնդրո առնչությամբ վաղուց հասունացած հետաքրքրասիրությունը:

ՀԱԿՈԲՅԱՆ Մ. Տ.

Պատմական գիտությունների թեկնածու